

四庫全書

史部

欽定四庫全書

史部

廣西通志卷

七十九至
八十一

詳校官給事中臣鄧文泮

檢討臣德生覆勘

總校官進士臣朱 鈴

校對官編修臣 廬 遂

謄錄監生臣王元愷

欽定四庫全書

廣西通志卷七十九

鄉賢

明

高嵩字世瞻宜山人弘治己酉魁鄉薦教諭保昌
後伴讀興府陞審理正世宗即位累遷太僕寺少
卿遣行視京營諸處操騎及順保河三郡馬政會
大禮議成有上言乞遷顯陵者嵩極論其不可以

為松林一山龍虎盤踞皇上入承大統雖由天啓未必不原於此今欲起萬載不搖之壙跋涉數千里之險非惟陛下暨臣等之心不安雖行道之人亦有所不忍者上意乃止不數年以卿領太僕上言馬政便宜數事卒於官賜祭葬廕其孫壘

舊志

李高字仰之灌陽人正德八年舉人嘉靖二年進士為南臺御史時元城令張好古收泰和伯陳萬言家屬治之萬言藉寵白之上因遣官校逮好古

下獄高率諸御史為奏其畧曰昔漢馬廖慮美業之難終三致意於宮中四方勸成明德號稱賢戚光武不以姊湖陽公主之故加怒洛陽令董宣史臣稱之願陛下釋好古復其官誠諭萬言追蹤馬廖不失賢戚之名不但元城人式歌且舞天下必傳誦無窮已奏入下法司人以高一疏婉切有體

云

舊志

馬文祥字時明桂平人與弟文奇博洽善文詞文

奇魁於鄉文祥由歲薦授文昌知縣會採珠議省
珠池無益費界多海寇計圖綏靖未幾遭內艱復
補宜城縣上知其才擢南京戶部主事出理鳳陽
諸倉奏最荷封典以疾告歸所著有西園傳美集
縣志

蒙詢賓州人嘉靖壬午舉人授湖廣承天府推官
遷知歸州申減茶稅歲饑為粥以賑陞撫州同知
楚人思之立祠以祀

舊志

蔣恩全州舉人嘉靖五年令惠來時縣治初立百
度未備恩至寄寓村落始相度基址建城郭公署
畫街市以奠民居雖工役皆興民不告勞暇則躬
行田野課以農桑復請設學校使人知文教在任

六年卒士民至今德之

廣東名
宦志

李允簡字可大融縣人嘉靖壬午舉人除夷陵學
正攝荊門州陞知內江所至公廉自持大旱齋沐
祈禱三日霖雨四沛嘗於通津治石梁御史題之

曰壽溪壽溪者李所自號御史以旌其能得民也
遷守茶陵州內江民留之不得為立石允簡至茶
陵均徭賦別奸蠹豪民為之斂迹最上當遷茶陵
人願得展一年俟黃籍成民受十年之賜陞雲南
同知攝守潞江治更精練斷獄平允豪有奪民田
者勒令歸主不服再訴於朝下法司皆如所論任
滿去滇民立石如內江尋陞思州知府貴州麻陽
苗為亂入城殺掠允簡巷戰不勝與其孫文炳皆

被執出盤山關允簡遂自投崖下賊驚共拽出棄
之途思人昇還至清浪衛卒事聞贈貴州按察司
副使廕一子命按察司僉事戴梗諭祭於家賜葬
融縣之高沙昌八嶺初允簡以孤城寇多遣其孥
歸里獨與孫文炳居後文炳以重賄贖還

縣志

潘嗣冕字宗周靈川人嘉靖壬午舉於鄉授湖廣
城步知縣調繁長沙三被薦剡轉嚴州府通判職
錢穀常例羨餘歲計千金嗣冕歷五年秋毫無染

署淳安民被其澤進趙州同知丁未歲旱徒跣求
禱有蛇迎於前大雨如注是歲大稔其入三倍禾
有雙穗者御史李中谿記其事家居為士林所推

稱堯峰先生

縣志

呂璋字古愚臨桂人以明經授廣東徐聞令為政
不事鞭扑教民如家人父子未期年邑敦禮讓幾
至無訟臺使者連章薦會俸滿報最聞其子大魁
遂乞休及卒邑人立祠祀之後以子貴贈少傅兼

太子太傅吏部尚書建極殿大學士天啓甲子其
孫大英任惠州別駕遣人至徐聞訪祠猶尸祝云

縣志

宋塗字德中賓州人登嘉靖乙酉鄉試授揭陽教
諭陞銅梁知縣專尚德化釋李方等九人之冤酉
陽永順十四司構怨上官命招撫之衆皆輯化時
有馴鶴嘉禾之異邑人建集鶴亭進儋州知州鋤
豪強寬徭役弭昌江水患復榕莊公田化生黎為

編民奏立順黎附黎二圖鄉人安業未幾卒於官

民為巷哭後祀於東坡祠

舊志

董德明字汝哲臨桂人嘉靖壬辰進士授南雄推官歷戶曹出知處州有遺愛整飭曹濮兵備有擒賊首施尚詔功以河南叅政致仕抵家日與閭里款洽有屬以官事者德明不應招行酒者酌滿語曰月色清佳止宜縱飲何得預人家事其人語塞有故人辭別之官德明載酒追送伏波山下臨發

憲憲曰子行矣愧無以贈贈子以不貪耳故人拜受而去德明素行廉潔家無餘貲卒之日幾不能殮其子貸於姻黨乃克舉喪

縣志

楊際熙字惺中容縣人嘉靖戊午舉人任松滋令築隄障江邑人賴之召入拜御史居南臺直言敢諫不避權貴萬厯初通行錢法松江豪強梗法聚市井無賴倡饑民撓命勢甚猖獗疏言朝廷恤饑民不宥亂民稱旨辛巳兩畿大察屬甄別淑慝不

憚大吏忌者中之遷雲南僉憲以終養歸子允京

亦登鄉魁令溫縣廉介有父風時稱楊氏世家

舊志

經希汲全州人嘉靖壬午舉人知陝西城固縣興

學愛民有令名

州志

陳邦修字德卿邦偁從弟少孤究心經史天文地

理律歷諸書無所不博登嘉靖乙未進士初授行

人改刑科給事中歷戶禮兩科劾竊國公郭勛尚

書嚴嵩張瓚都御史胡守忠等不職又極論楚世

子逆悖乞敕定東宮出閣往還儀節陳清牙牌等
疏上皆嘉納內艱歸廬墓三年復補工科陞南太
僕寺少卿致仕

舊志

陳統字道傳懷集人嘉靖甲午舉於鄉授從化訓
導遷閩縣教諭性醇雅嚴條教造就人士甚多尋
轉寧化令愛民如子以疾歸好學不輟

縣志

梁壯懷集人由明經丞南海歷署南海三水從化
縣事政寬平所至與士夫講求民瘼興利除弊值

攢造請免絕戶數千口民多頌之然鯁直以事忤

上官桂冠歸隆慶間尚書潘思銘其墓

縣志

王銅昭平人全州衛指揮使王鰲弟庚午大征古

田改縣為州凡百煩劇皆屬綜理削平四十年鼎

沸之亂招撫數千百家總督軍門劉薦銅功第一

陞牛河欽依把總未任坐事丙子征上下四屯復

破五指三叉白帽等巢奉委鎮守昭平督造城池

捐貲三百兩闢思勤江金田腦二大路架木橋四

十餘處以便往來撫按叙功保薦昭平守備未幾
歿索無遺貲當道支官銀以殮

舊志

徐養正字吉夫馬平人嘉靖辛丑進士改庶吉士
授給事中論罷大學士嚴嵩黨府尹戴某者嵩銜
之已而發嵩子世蕃奸狀嵩怒甚擬旨杖養正謫
通海典史量移肇慶推官歷陞貴州提學僉事以
喪歸復起領雲南學政教條嚴肅集諸生於五華
書院兼課文行前布政使死於沅江罪人未得養

正行部將至沅江廉得其賊黨購殺之人莫不多
其謀畧已遷南京光祿少卿改尚寶時世蕃方行
尚寶事養正不欲與同列請告歸嚴氏敗養正始
召入歷還南京工部尚書丁內艱甫服闋卒之夕
自云真西山先生至起迎之為揖遜狀須臾而逝
舊志

殷從儉字汝中臨桂人嘉靖甲辰進士願就博士
官教授廣州陞國學擢駕部主事陞廣東屯鹽僉

事攝嶺東兵務倭奴猖獗提孤兵當一面勞勩萬
狀偶與制府議軍事相左遂引疾歸尋起為福建
僉事歷南太僕少卿廷議討古田擢開府南轅復
改福建所至務守便宜非太甚無輕舉尤不喜苛
細初倭發難時籍民丁田為成饌名曰丁四糧六
每易一撫臣輒增數千金至四增而九六增而十
三即歲大侵猶取贏焉民倍稱輸餉間里蕭然乃
為汰虛籍裁冗費復丁四糧六舊賦民困以甦甫

以內臺簡名疾三日卒民思之不置為崇祠祀之

縣志

余勉學字行甫柳州人登嘉靖癸未進士授錢塘知縣黠吏猾民相戒不敢犯性甘清苦門無私餽士民敬且愛之擢監察御史遇事敢言太宰汪鋈秉銓不法列其狀以聞上怒下詔獄尋以汪敗得釋左遷連州判官回荊州縣凡十餘年陞知徽州府歲大旱發倉賑濟民賴全活甚衆徽俗健訟每

以理論遣幾空圉圉丁內艱起補常州進天津兵
備副使嚴世蕃嫉之甚嫉言官劾之事白補貴州
視獄多平反轉福建叅政進按察使仍以觸時忌
致政歸歷官三十餘年清節著聞不增田宅柳人
稱鄉先生可法者必推勉學云

舊志

拱時字道軒臨桂人嘉靖丙戌進士廷臣之子也
少負雄畧不事儒業惟習武經嫻弓馬由武科登
嘉靖壬戌武進士署本省正千戶奉調征古田率

所部南丹目兵奮勇前驅多所擒馘叙功准實授
復征平樂府江及昭平四屯所至皆能破賊直抵
巢壘屢以功歷指揮同知後乞休時喜讀書有儒
將風且御下以恩士卒樂為效死故每戰輒有成

功

縣志

王寵融縣人嘉靖鄉貢進士初授國子監博士陞
永淳知縣甫莅任毀汚寺杖淫僧大振風裁居鄉
黨飲席過六豆則望望然去之

舊志

文章桂林人嘉靖間以鄉薦知增城性廉靜門無私謁里胥徵收者強索耗例以媚令輒侵牟其半章禁絕之學校壇宇莫不增修遷欽州守歷處州

同知所至有遺愛云

廣東名宦志

劉凱字少川桂林人嘉靖己酉舉人知臨湘清介自持周悉民隱時有民謠云劉少川不要錢百姓

有飯官無鹽

湖廣名宦志

李桂字廷芳全州人嘉靖十七年以舉人擢大埔

令沉毅善決獄縣多僧田例以給軍餉歲苦重徵
桂為申省之並革三河壩稅節用愛人崇文造士
有古良吏風以憂去囊無餘積諸生為助費獲治
裝百姓遮道哀送繪像祀焉

廣東名
宦志

侯嘉祥橫州人嘉靖十三年舉人任當陽知縣民
有羅仲仁者夜殺其二弟詰朝以盜殺告嘉祥察
其辭色有異輒叱曰汝殺人當復誰捕竟抵其罪

邑人稱為神明

湖廣名
宦志

蔣時行全州人嘉靖丁酉解元知桂陽州大橋嶺賊蜂起州邑騷然當事議討之時行躬詣賊巢諭

以禍福賊悉就撫州境帖然

湖廣名
宦志

洪經興安人嘉靖間知臨高縣廉明果斷軫恤民瘼興利革弊務竭其誠覲還將歸士民相率保留至瓊迎者數百人為上官所忌掛冠去民泣送之

廣東名

宦志

戴希灝柳州舉人嘉靖二十一年為永昌同知愷

悌廉明絕請託卻夷金興水利勤講課在任八載

遷長史去之日行李蕭然士民泣留遮道

舊志

項邦柱桂林中衛人嘉靖甲午舉人知感恩縣賑

恤凶荒視民如子值黎亂躬詣諸岡多方撫諭以

勞瘁卒

廣東名宦志

周賢柳州舉人嘉靖中任知縣推誠愛民民不忍

欺官至大理寺丞

舊志

田鏞字龍湖永淳人嘉靖癸卯登鄉書杜門養母

足不至公庭遭歲歉靈竹鄉韋師聚衆三百人剽掠時議剿之鑄急白縣令請無用兵單騎造其壘諭以禍福衆環聽泣下鑄率三百人詣縣謝罪復為良民謁選倅岳州岳臨洞庭湖寇出沒鑄以計擒渠魁餘黨解散適三殿大工興取材於楚鑄督木赴京卒於途萬厯三十七年祀鄉賢知縣童時

明為立傳

縣志

鄧繼科字瑩臺宣化人登嘉靖癸卯賢書任廣東

惠州府司李時海氛弗靖繼科有退賊功陞雲南府同知致仕歸素行端方鄉黨欽重當事交相矜

式天啓間督學魯請祀鄉賢

縣志

易元貞字正之桂林人嘉靖己酉自崇陽令調平

江縣清介自持遇事不苟恤孤弱禁強禦暇日延

諸生論道談文當道交章薦之報至卒囊無餘物

殮葬皆出於士民遐邇哀痛為之罷市崇之士民

亦至平江泣弔

舊志

王化字汝贊馬平人父尚學職方郎中化登鄉薦
嘉靖四十年新置平遠縣授化知縣以擊賊檀嶺
有知兵名田坑賊梁國相既降復叛約三圖賊葛
鼎榮等分寇江西福建初縣城櫓未立化寄妻子
會昌而身率鄉兵往擊賊連敗乃縱反間會昌言
化已歿化妻計氏慟哭自刎化怒追賊益急獲國
相於石子嶺遷潮州府同知仍署縣事計被旌官
為立祠化舉卓異超擢廣東副使

舊志

張言字拙逸臨桂人策之子也登嘉靖丁未進士
初知江西永豐縣減刑恤賦興學教民治行課最
擢禮部郎中陞知尋甸府惠政益敷尋致仕卒祀

永豐名宦本縣鄉賢

縣志

曾曙桂林人嘉靖己酉舉人為平湖令豈弟慈祥
清介絕俗時五月不雨秋大饑曙力請開廠設粥

以賑之寬其逋稅咸使歸業民免轉徙

參浙江名宦志

管惟乾柳州舉人嘉靖間為饒平令時土寇張璉

叛三省會剿惟乾築營堡練鄉勇饋餉不匱賊就擒復興學立社招集逃亡窮庶樂生饒民思之

舊志

呂天恩灌陽人嘉靖二十六年以鄉薦知從化才識過人敏於剖決吏民畏之上官知其能屢檄署篆視事南海政績懋著六年擢判肇慶民有去後

之思歷官韶州知府

廣東名宦志

劉日乾字體易蒼梧人舉嘉靖進士善真草諸書初授廷評擢通政司叅議慷慨仗義以獄獄持正

奪官去

縣志

黎聰陸川人嘉靖間任武寧簿寬愛得民催科不
擾值旱荒捐俸作糜粥民賴全活歲運期迫民窮
無措聰力補及額九年遷崇仁丞武寧民遮道留
之祀名宦

舊志

周希正宣化人嘉靖己酉鄉薦任知縣存心愛民
事上以直事多掣肘遂拂袖歸後以郡人推舉祀

鄉賢

舊志

劉宗武貴縣人嘉靖己酉舉於鄉任福建漳州同知以廉明稱歲荒盡出家資賑濟

縣志

李恒橫州舉人任江西安仁令為政有體不屑瑣細務賞善罰姦政聲洋溢丁艱歸民咸思之祀名

宦

舊志

何以尚字仁甫興業人父世錦以孝行聞以尚讀父書錚錚有奇節嘉靖壬子舉於鄉授建昌教諭入成均晉戶部司務會戶部郎海瑞上封事觸忌

諱世宗震怒下詔獄旋取讀感動太息帝有疾召
閣臣議內禪稱海瑞言以尚以帝無殺瑞意疏請
釋之帝怒命杖一百俱繫之獄遺詔得釋穆廟登
極起光祿寺丞以尚感知遇益慷慨論列不避權
貴劾輔臣高拱比之蔡京拱銜甚卒坐謫遂辭疾
歸及拱罷言官薦擢雷州司理歷南戶部主事尚
寶光祿少卿南大理寺丞鴻臚寺卿性故恬澹屢
辭乞休上嘉之詔晉太僕寺卿致仕歸及卒遣官

諭祭

梧州府志

張守約永福人嘉靖乙丑進士陝西道御史巡按直隸發奸摘伏復巡按廣東直聲振天下有西臺奏議行於世

縣志

呂調陽字和卿號豫所桂林人母夢巨蟒入室而生七歲就外傳自指千文律呂句曰茲吾名也因名之少長受易博觀史傳為文奇恣可喜嘉靖甲午舉於鄉登二十九年進士廷試一甲第二授編

修歷官武英殿大學士少保兼太子太保事父母
極孝居喪哀毀骨立親暱罕見其面立朝重名義
門無私謁時分宜柄政多附其黨調陽獨固謝不
往兩主會闡一分校三任成均率以身教先德而
後藝右愿慤而左智巧侍講經筵先期齋沐冀以
精誠悟君進講則引經據古切規時政諸藩王外
戚及中官有以踰制請者必議罷而諸曹郎吏亦
各凜凜奉職兩朝實錄悉其纂修一切典禮多所

釐定其經國文章更有垂諸不朽者以疾乞歸帝
遣御醫視藥命其子祠部郎興周侍以行賜帑金
百兩文綺二襲卒贈太保謚文簡

舊志

陳學夔字宜峰宜山人生而穎慧過目成誦年十
九舉嘉靖丁酉鄉試丁未第進士授江夏令政績
卓異徵拜福建監察御史益著風采權貴憚之奉
命巡按陝西禦賊有功陞六品俸事竣復按雲南
以骨鯁廉直得罪沐府左遷河南歸德守擢湖廣

按察副使整飭常岳兵備致政歸詩酒自娛一鄉

無間云

舊志

施懋字克昭橫州人嘉靖辛酉舉人授長壽教諭
陞吳川令未任丁艱復補大埔縣以政聲調程鄉
縣清廉惠愛擢南京陝西道御史曾疏儲教當急
轉雲南僉事平丁苴白盜欽賞軍功癸巳回籍本
州苦差馬役條議另招頂役入咸德之

舊志

蕭棟宣化人嘉靖乙卯舉於鄉為高要令廉而能

明刑清政理創建縣城興學造士後以憂去士民
泣送謂高邑二百年來長吏莫與媲美後補平江

倅衡州所至以賢聲著

參廣東
名宦志

陶守訓平樂人嘉靖壬子舉人性孝友官望江諭
聞父喪哀毀特甚諸生有江亭遺履記撫幼弟守
調極其友愛陞三水令邑有抽分廠商苦之即力
為申罷議添里圖革冗員裁吏役防倭寇立千戶
所悉乃心力邑西二十五里為龜岡圍計田數十

萬畝民居數千家介西北江間潦溢堤頽親履經
畫築之視故堤高數尺厚倍之人呼陶公堤邑之
良岡鎮在高要壤內時苦寧浪流賊守訓議築土
城請縉紳董成之舊於城外東偏築二臺一祀山
川一祀社稷二壇並列於禮弗稱守訓乃改立壇
壝祀社稷於西南祀山川於東南立三江書院以
淑人士又以邑編役太重鋪兵率皆冗設申議裁
其冗者減編以寬民民壯五十名守胥江巖石營

後巡按蔡公謂介屬上游地墟無衛復增民壯五十名加編愈重里排苦之申議撤回裁其新增分胥江司弓兵二十名守界牌民有鬻子完稅者贖還之加意士類篤行鄉約集庠士輯縣志六年擢南曹民立碑思之歷南戶部郎守鎮遠府撫苗夷通商旅建橋梁乞休家居蕭然壁立

舊志

李冠字世瞻橫州人授四川銅梁縣有惠政及去

邑人祀之

舊志

秦煒字後明容縣人以歲薦入監初授湖廣黃安縣耿直狷介恥媚上官邑常饑疫道殣滿目捐俸請賑不遺餘力存活者三萬餘會與楚撫齟齬左遷民聚壘祝之耿定向重其清白贈以金歸長子

時懋成進士

縣志

唐廷燦字振東全州人嘉靖甲子舉人任石城知縣多仁政民甚德之家居樂善惠及鄰境祖孫父子兄弟相繼登賢書凡十三人蟬聯勿替人以爲

世德之報

州志

王貽德全州人嘉靖乙丑進士由部曹為嘉興知府介節自持時屬令多貪悉力罷之一郡稱快陞河南副使歷滇臬晉藩每逢銓部計吏清名為天下第一加太僕寺卿卒祀鄉賢子孫五代皆登鄉

薦

州志

歐陽經字時用恭城人嘉靖甲子歲薦授閩都司經歷任九載有賢聲秩滿陞蜀威州知州甫莅任

革里甲夙弊殆盡民歌廉愛生番亂魚肉其民率

熟番平之民賴安堵

縣志

高瓊字藍田宜山人嘉靖間歲薦任饒州府經歷
清慎有才能時淮府奪民湖利屢訟弗決瓊奉委
處之帖然饒故多盜皆湖濱惡少串合勾通瓊廉
得其實擒治按法盜賊屏息子應暘字貞所嘉靖
壬子舉人博雅多才史學尤邃初任浙江龍游教
諭課士有賢聲陞奉化知縣剔奸摘伏丰采嚴峻

人不敢干以私後以艱歸士民思之為祠以祀所

著有青鳥山人集

舊志

侯嘉祐字吉甫橫州人嘉靖乙卯鄉薦敦清節不

入公門干請及任長泰縣知縣清惠公敏尤善折

獄萬歷二十五年入長泰名宦次年舉祀鄉賢

舊志

楊表字子儀藤縣人嘉靖壬子舉人令如臯左遷

潮州府教授因行役為海寇過天星所刦臨以威

武不為動飲噉如常寇憚其量且懈於防遂誘巨

魁為反間得脫尋陞瓊州別駕清風介節聲溢海上晉知南安遂致仕歸家居十餘年蕭然簡淡益

稟於天性云

舊志

蔣煇字子厚全州人嘉靖癸丑進士授御史方入臺遣監刑見楊員外繼盛在刑中煇即為具奏曰楊繼盛越職妄言自取重辟其妻哀懇願以身代匹婦何知一死非易繼盛既不能將順聖明又何能儀刑寡妻此必中有激而然也繼盛就刑妻必

並命恐傷陛下好生之仁反令匹婦立義千古願
陛下將繼盛暫緩其死奏上不報繼盛死於市惇
內不自安未幾移病歸卒

舊志

舒應龍字中陽全州人嘉靖壬戌會魁初任廣東
東莞縣發奸摘伏如神擢銓司主政歷官至漕運
工部尚書修河有功後致仕歸卒祀鄉賢子宏志
萬厯丙戌探花

舊志

楊繼文字猷國容縣人嘉靖戊午舉人初令海豐

惟持廉節轉武昌別駕守沔陽益飭蠶簋有惠政
同知瓊州督戎海防招降巨寇李茂會有忌功者
改秩去祀名宦父禮封瓊州府同知

縣志

文體義全州舉人嘉靖四十二年知大庾縣先是
流寇再窺邑城體義請築六城於水南新田鳳凰

山等處民恃保障

州志

張翀字子儀柳州人嘉靖三十二年進士授刑部
主事疾嚴嵩父子專政抗章劾之大畧謂嵩招權

納賄樹黨營私軍政叙遷率由販鬻而將吏養驕
壞祖宗防邊之計度支輸餉半作餽遺而邊成窮
餒弱祖宗養之軍假借名器蠱惑無恥而絡繹
奔走靡然成風有如狂瀾敗祖宗培養之人才詞
甚切直書奏逮下詔獄拷訊謫成都勾穆宗嗣位
召為吏部主事再遷大理少卿隆慶二年春以右
僉都御史巡撫南贛剿平萬羊山及南雄劇賊瑤
獠為西粵梗疏請先剿古田次及八寨上是之移

撫湖廣召拜大理卿進兵部右侍郎以侍養歸後

卒於家天啓初贈兵部尚書諡忠簡

節舊志

梁國相賓州人隆慶庚午舉人歷任雲南楚雄知

府從征有功為政以卓異著績

舊志

張大亨全州人弱冠領鄉薦謁選長安值嚴嵩當

國嵩以世誼厚相延接大亨遽引疾歸越二十餘

年嵩罷相始出判端州隆慶戊辰擢楚雄郡丞攜

一蒼頭一稚子洒然自適於吏事迎刃而解芟除

九場巨憇郡民依之若父母比入覲以經費不給

中道徑歸其家

州志

鄧文學馬平人隆慶中以舉人知清遠縣改建學

校士林稱之尋撫剿猺獞有池水之捷及卒士民

舉祀名宦

舊志

周希尹宜山人嘉靖甲子舉人隆慶六年知衡陽

縣剖決如流邑無滯事汰冗役民不煩擾公庭肅

然五年陞廣州同知後陞姚安知府持大體簡煩

苛所屬禮貌不少假借土官奉法惟謹建尊經閣

星諸閣修中南書院甃大石泐諸閘士民德之

縣志

蔣蘊善全州人嘉靖乙卯舉人隆慶間知海康縣

事清介自持愛民如子常祿外毫無苟取剖決案

牘吏不敢欺隆慶四年海賊突至衆心震恐蘊善

便服登城督兵守禦時叅將某坐視不出往諭之

曰安有身為將而賊至巽縮者干城之謂何叅將

愧悚甫逾年以憂去士民思之

州志

牟春華字萬林鬱林人隆慶丁卯舉於鄉授詹州

牧孝友性成居官廉惠崇禎十四年紀鄉賢

州志

劉元相字我忠全州人隆慶丁卯舉人事繼母以

孝聞初授華容諭洎令嘉魚倅肇慶俱有聲陞高

州府同知羅旁始平督臣議建封門函口南鄉富

林四所防盜重元相才令專董其事元相經營有

法不踰月完版築時叅將楊照守函口病卒士卒

死於瘴疫者半代楊照者黃允中憚行議遷其地

當路許可元相力爭曰函口西接巨嶺南界高涼
實猺獠出入之險無函口是無西山也人臣為國
守封疆允中不往請以身居之議遂寢其後西山
諸境宴然無事皆元相之功後竟以勞瘁卒

舊志

張孫繩字約齋臨桂人隆慶戊辰進士授信州司
李以卓異徵入歷吏戶禮刑給事中正直立朝屢
疏張江陵奪情專政語甚峻出為陝右觀察尋引
疾歸江陵敗起浙憲轉蜀晉閩滇臬藩擢應天府

尹擊暴鋤強豪驚斂跡興利除害銳意便民間五載致仕終養卒贈正議大夫工部右侍郎賜祭葬

廕一子

縣志

曹學參字惟齋全州人弱冠領隆慶丁卯鄉薦初署長葛教諭陞連山知縣有異政調新會令縣近海多盜募壯士緝之寇聞名相戒曰無犯曹使君境遂引去以德感人民間凡舉子皆以參命名考最為天下第一常捐俸修陳白沙先生祠為置祭

田尋以疾乞歸民塞道遮留肖像於三賢祠祀之

時以吳隱之方其清操云著有梅巖詩集卒祀鄉

賢子正經萬厯丁酉經魁和平知縣克守清白

州志

歐陽州字汝行恭城人性篤實事繼母孝領隆慶

壬申歲薦選東莞縣丞有能績署邑篆一載清慎

得民尋致仕歸合邑立碑年八十終

舊志

蔣資乾字天秩恭城人幼聰慧日記萬言隆慶丁

卯年十七舉於鄉署臨桂教諭以當事薦陞助教

遷南刑部主事累遷郎中治獄持平於大愆不少
假貸却巨豪賄金聲望蔚然未幾以疾卒於官弟
資坤領戊子鄉薦署肥城教諭分校京闈所拔悉
名士陞都勻推官值黔民凋疲一意思恤之解官
歸人稱二難

舊志

張文熙字念華臨桂人廣記博聞中隆慶丁卯鄉
舉丁丑成進士讀書中秘改御史暨巡鹽巡漕巡
京畿刷卷纂修實錄按陝西復按浙江壬午科浙

文武考文熙兼董之居官寬猛並濟值兵民兩變
為解紛爭頃刻撫定越人服其英決建祠祀之擢
應天府丞歷太僕卿致仕歸以著述自娛戚里貧
乏者周之著有壬癸艸雲巖集罔窠山房全集按
浙錄救寧錄生子三玉輅衡皆以青年同舉鄉試

縣志

廣西通志卷七十九

欽定四庫全書

廣西通志卷八十

鄉賢

明

何敦復字學敏世綸子領嘉靖鄉書萬厯間官駕
部員外郎遇事剛直不為同官所容謫判姑熟移
丞潮州清介自矢嘉惠學校置市租於海陽以佐
祀建韓昌黎祠於澄海時延諸生校課所至皆有

惠政潮人今配祀韓祠

參廣東名宦志

蔣季炯字和陽全州人萬厯癸酉舉人歷任雲南
昆陽知州有德政母老致仕相國葉臺山贈以詩
曰吏隱梅溪水共清鳬飛又喜到江城桃花兩邑
栽應遍麥穗三春瑞已成私舍月明看鶴舞訟庭
雨過見苔生西郊不少干旌去誰似攀轅此日情

舊志

曹學易字肖川全州人萬厯壬午舉人筮仕任邱

教勤於課士陞桂陽知縣愛民如子楚人誦之遷
黔定番知州撫綏有方尋告歸以祖遺宅產讓其
弟鄉人稱之

舊志

郭應翰字義所懷集人萬厯癸酉鄉薦初任感恩
縣諭聘江西分考所拔皆一時名流陞襄陽令興
水利修學宮革羨耗繕城垣漢江患寇應翰率兵
進勦寇宵遁襄民德之陳情歸居鄉三十六年鄉
賓三十一次其方正比之王彥方陳仲弓云

縣志

阮悉懷集人萬厯辛卯鄉薦初令英德繼調雩都
從吉州郭子章講學化民當道交薦邑人建祠以
祀再遷雷州別駕化洽政平荏苒斂跡建義倉創
學田署徐聞併欽州篆民皆立去思碑及致政歸
奉母龍氏年九十七終

縣志

謝朝紀字念溪宜山人性孝友登萬厯己卯鄉薦
仕善化令遷判延平隨擢知雲南阿迷州歷任清
廉政聲洋溢解組歸遺愛在民舉入名官居鄉二

十餘年存心施濟歲荒為粥賑饑全活甚衆稱貸者焚券不責償置義田養寒士助貧弱婚葬懿行

難以盡述

舊志

吳邦俊臨桂人萬厯丙子舉人知瓊山縣為政寬和居官廉潔火耗贖鍰一毫不染清操可風

縣志

呂興周字渭南臨桂人幼警敏勤學足不窺園下筆千言立就萬厯丙子舉於鄉丁丑成進士年二十授禮部祠祭司主事遷員外郎中時福藩倚母

鄭貴妃專寵陰欲奪嫡神宗將有三王並封之意
舉朝無敢言興周特疏爭之上感悟東宮不搖中
外譴之尋轉光祿少卿再擢應天府丞以疾予告
歸凡鄉人冠婚喪祭力不能舉者皆周之以為范

純仁再見云

縣志

陶明禮平樂人萬厯丙戌進士官長樂知縣以修
廢事除煩苛忤當事貶驛丞隨復原官不赴居鄉
佐修志書記鄉賢

縣志

嚴遵試賀縣人萬厯辛卯舉人宰英德英毅敏幹
讞決兩造稱平凡輕罪悉令薙藥草根以代贖緩
服毒輕死之風遂息

平樂府志

唐世堯平樂人萬厯乙酉省解丙戌進士授寧波
推官擢吏部主事典試粵東供應毫無所取原任
御史萬國欽主事饒坤皆以國本建言忤旨世堯
與尚書陸光祖共推舉之遂鐫秩南還圖書外無
長物時當道議闢府江險灘力贊其成又纂修府

志貂璫採權於昭怙勢橫行莫敢誰何世堯以大
義折之貂璫側目居家孝事二親色養備至割腴
產以贍異母弟後補原官泰昌初卒贈光祿寺卿

平樂
府志

梁允玳懷集人由明經萬厯七年任上海丞革去
糧長贄見銀八百兩隨陳一切運糧赴京陋規並
革亭青浦三邑概列款於直指使者革之歲節省
數千金會以憂歸遂決志養母不復仕進與弟允

環友文煥怡情山水別號雲松

梧州府志

曹學程字希明全州人萬曆癸未進士歷知石首海寧治行稱最擢廣東道監察御史神宗朝疏諫易儲封倭諸大政以切直忤旨擬死繫獄十有二年每秋臨錄刑者數一日縛赴市曹風霾蔽天拔木飛瓦刑官復奏免猶未赦各官連疏申救凡三十餘上多言其母年九十餘哭子待斃帝卒弗聽其子正儒三刺血上書乞貸父死終不省丙午九

月始用朱賡言謫戍湖廣寧遠衛久之方歸卒天

啓初贈太僕少卿崇禎時以孝子旌其子正儒

州志

楊際會字仕遇容縣人性敏好學萬厯丁丑舉進

士知六安州尋以兄際熙巡按上江循例調潁州

巨豪武斷際會置之法郡人稱快晉戶部郎出守

饒州時樂平饑民嘯聚煽亂單車諭散其黨亟發

賑之遷閩臬叅楚藩卒於官祀名宦

舊志

李希說字則省橫州人萬厯丙子鄉薦授興寧知

縣大計考清廉第二先萬厯庚寅歲饑希說時為
孝廉州人請借預備倉穀二千石賑濟至冬希說
自捐補還鄉民思之

舊志

張孫美字亨齋臨桂人賦性端方言行不苟萬厯
丁酉登賢書任潮州教授啓迪諸生進德修業擢
四川定遠令興起教化勸課農桑革除弊政士民
戴之致仕歸嚴率宗族長幼咸秉禮義舉行鄉飲

一邑奉為儀型

縣志

舒宏志字心矩全州人尚書應龍子有奇才弱冠
登萬厯丙戌進士廷對策多譏刺時政閣臣不敢
置前列神宗竒之拔置第三中外驚異稱上神明
得人授翰林院編修博極羣書過目成誦學問淵
邃萬言立就惜享年不永未展其蘊云

州志

龍國祿桂平人萬厯乙未進士官廣東惠州湖廣

岳州四川重慶三歷知府皆有善政百姓歌思

舊志

蔣獻貞字鳳儀號慎旃全州人萬厯己酉舉人任

雲南歸化令多善政舉卓異調繁昆明陞南京工部主事督江南七省糧餉所至清介自持便道省親丁父艱服闋應補因母老家居買穀備賑歲以

為常州人佩德兩臺以忠孝三疏請旌

舊志

甘汝遷富川人萬歷十九年以選貢知三水縣節儉慈愛嘗單騎行縣講讀六箴躬親解說延見父老教育子弟人親之若父母歲旱為文禱神三日不雨自繫以禱須臾大雨滂沱四野霑足災疫必

躬禱之胥江盜麥孔陽等晝為漁人夜則羣繫檣
桅操之若飛往來剽掠殺人沉之深潭無知者汝
遷廉得其情召善水者撈骨為証會潭深不可得
乃焚香告天朱書沒者之臂曰取骨伸冤遂躍入
盡撈而出盜始伏辜每詣郡凡他邑獄難決者上
官悉以委訊有業箕者傭於人家箕斷自刺其腸
而死誣人殺之數年不決汝遷一讞即白其誣合
郡歎服其為政精誠明敏多類此

舊志

童元鎮桂林右衛人萬厯中為指揮從討莫天龍
有功屢遷遊擊將軍高江猺反破平之歷永寧潯
梧叅將進副總兵擢廣東總兵總督陳大科以元
鎮熟蠻事仍移廣西時岑溪西北蒼藤東南一帶
猺賊盤據久為民患元鎮率諸軍進討賊伐大木
塞道環佈菰簽元鎮詳督軍開道而潛從小徑上
孔亮山賊憑高弩矢雨下諸軍奮死用火器攻大
破之俘馘一千五百有奇餘招撫復業以功賜金

增秩李化龍大征楊應龍令元鎮督永順鎮雄泗
城諸土軍田烏江進永順兵先奪烏江諸軍既濟
復奪老君關叅將謝崇爵督水西泗城兵乘勢再
拔河渡關三月望賊以步騎數千來衝水西我軍
驅象出戰俄象反走擲火器者誤擊已營陣亂遂
為所破殺溺死者數千人賊復直趨烏江元鎮軍
出不意亦大敗殺溺死者殆盡江水為之不流事
聞下元鎮罪當死以前功得原戍煙瘴卒戍所舊志

袁鳴泰平樂人萬厯庚戌進士官青田知縣丁父
艱歸居喪以孝聞起補莆田縣直道與鄉紳忤去

官有紀行實錄祀鄉賢

縣志

呂大英字元聲文簡曾孫幼多穎悟博聞強記垂
髫游泮以廕入太學授廣東惠州別駕署篆興寧
革陋規裁冗費清盜源建學宮惠地惡俗與人有
隙即服斷腸草以圖賴訪知之諭百姓挖其根獲
一石即准銷贖銀一兩毒草幾盡時鄰境盜刦餉

金數千緡之盜招匿竈下起之不得盜亦旋斃大
英慮良民受害齋戒禱於城隍數日雷電大作盜
家地忽裂得金數百距前死盜所指賊處僅咫尺
諸盜陳伏願自首不踰月原金俱完人咸服神明
感格督撫商周祚廉其事特薦之薦未到部三日
以例轉王府長史乞休家居不事生產而賑饑周
急無所吝惜卒祀鄉賢

舊志

趙獻素字南石全州人萬厯壬子鄉薦歷任戶部

郎中耿介尚氣節居鄉醇篤有古人風

州志

張宗煒字我見臨桂人以廕仕通政司經歷移光祿署正遷戶部主事分司河西鈔務例得美金三千餘悉報部克軍餉陞郎中督理延綏糧餉時三邊重鎮軍兵數萬籌畫輸運咸中機宜當事者薦知貴州鎮遠府苗寇犯郡宗煒同民甘苦百計守禦蠟丸請兵武岡剿撫並用苗寇胥服士民安堵乞休居家多善行鄉里重之

縣志

朱宏字海若臨桂人萬厯乙卯舉人賦性孝友不
妄干謁人目為真孝廉授橫州學正克端師範教
人必以孝弟為先遷知吳川海寇為亂躬自臨戎
守禦巡按某贈以詩有墨綬書生也佩刀之句晉
知崖州禮士愛民興利剔弊士民德焉未幾守將
妄以他事中傷崖人數百渡海代鳴其冤事白宏
曰吾聞知足不辱知止不殆遂棄官歸崖民思其

遺澤崇祀名宦

舊志

唐世照字伯闇灌陽人萬厯壬子舉人幼孤奉母
以孝聞仕饒州通判改雁門關以邊防受知督府
題署代州三年實授知蘄州廉敏有長才士民愛
戴時土賊犯楚江黃騷動乃設立三關募敢死士
守禦間發伏兵屢殲渠賊城賴以全在任八年卒

民歌思之祀名宦

縣志

陸經術灌陽人萬厯乙卯舉人性端嚴歷安仁臨
安令以吏才薦陞北城兵馬司轉戶部主事剛直

忤宦官調綿竹令值流寇犯川西築城垣百計堵禦邑賴保全收活流民以萬計叙授川西兵備

僉事乞休歸士民泣留為建祠

縣志

唐允中灌陽人登萬歷己酉賢書父子繼有仁德高隱允中亦醇謹有古君子風歷官廣東提舉黃州郡丞屢膺薦獎陞建昌知府乞歸養親父九十歲卒允中哀毀過甚歿祀鄉賢孫象益舉

國朝康熙丙午解元人以為世德之報

縣志

常真傑恭城人萬厯癸酉鄉薦以清介治鄧州先是鄧有水患莅鄧者率傳舍視之真傑愀然曰奈何魚鱉吾民也乃捐俸鳩工築堤以禦鄧舊有礦稅每歲入二千金民苦之力為奏免郡人醵免金為壽真傑正色曰若以乃公為壟斷者乎既請免又利之是易法也卻之置書院延民間子弟讀書其中常夜呼酒聽書聲至雞鳴不倦一日聞子懋中舉鄉薦首即解印歸家居四十年祀鄧州名宦

平樂

府志

常夢龍字仲洲恭城人萬厯甲午舉於鄉任保定通判主餉居庸闕有能聲條陳漕運五款悉中時宜剔釐驛稅節省稅羨歲餘二千三百金以助軍需考績保留加陞郡丞仍管前事卒於官合郡勒

石建祠祀之

平樂府志

呂大韶字明變臨桂人文簡曾孫弱冠應童子試俱第一中萬厯丙午亞魁授四川叙州府推官丁

父艱服闋補授江西瑞州推官治獄明允署縣署
府政聲優異性骨鯁不合時宜挂冠歸不入公庭

不會賓客以詩酒自娛

縣志

徐可行字心如宣化人登萬厯甲辰進士歷戶部
郎中時邕舊例糧入公帑者凡三項民苦繁耗奏
請編為一闔郡稱便壬子主試河南拔鄉薦八十
人皆名流卒祀鄉賢

舊志

陳堯典字闢荒蒼梧人早孤家貧力學登萬厯癸

邠鄉書選於潛令治簡靜潔已愛民有循良風邑
南浮溪宣歙孔道每山水驟漲行旅艱阻堯典捐
置渡田人常德之遷廣州別駕署增城有惠政遷
韶州江防丞湏江故多盜禁約嚴肅盜不敢犯三
院交薦其才擢宗人經歷丁內艱服闋晉戶部員
外郎出理河西稅務還京轉郎中陞叙州知府叙
故饒沃而事多阻撓堯典操持潔白人無從干以
私秩滿轉長蘆鹽運使時軍需孔亟堯典為清弊

完逋卒以豪商中傷罷歸

舊志

伍世奇全州人萬歷丁酉舉人授龍門縣先是邑苦稅繁前官議欲派入民糧以便徵收世奇下車即集父老商之曰稅雖不便有時而蠲一入實徵恐成定額後不可減竟不編入民永賴之

州志

侯邦治臨桂人嘉靖戊午舉人萬歷間任從化知縣政尚寬平聽訟必得其隱徵賦例有加收悉為禁革攝理番禺剌煩治劇才能益裕值行弓田法

乃親履畝畝指計目量推新增以補舊失適足原額而止吏難逞奸民免加賦衆甚德之以改調去

民立祠祀之

廣東名宦志

鄧承芬字鐵臣全州人萬厯戊午舉人歷任長沙知府分巡湖南道居官剛介軍吏畏威士民懷德歸之日囊橐如洗接物藹然人稱長者

舊志

陶宗孔字凝一全州人萬厯間舉人任岳州推官九年捐介嚴正始終如一常種蔬自給岳宿苦漕

運武衛封兌為患至殺人宗孔論請正法楚人呼

為青天立碑紀德增祀四賢祠

參湖廣
名宦志

文應麟字泰徵興安人萬歷戊午領鄉薦初任什
邠縣有清操時歲大旱應麟步禱義眉行烈焰中
數日遂大雨民賴有秋陞隴州多旱田民不諳水
利教以水車人甚便之士民感德為立祠以祀丁
憂歸教授食貧不以介意鄉人推重年七十一卒

祀鄉賢

舊志

曹國祺字介之全州人登萬歷戊午鄉薦孝子正
儒之子崇禎間兩令分宜加意撫字清風惠政終

始如一祀袁州名宦

舊志

葛彥富川人以明經除廣東衛經歷有潔操管湖
西商稅秋毫不入私橐歸之日行李蕭然居鄉尤

恂恂年八十卒

舊志

徐應坤懷集人萬歷間選貢性廉直孝友官嘉定
州判歷捷為令除積弊開鹽井興學校邑人德之

立祠尸祝宦歸窶甚守道徐大儀知其賢分俸以

贈力辭不受其耿介如此

縣志

章極永福人任貴州黎平推官多善政民甚愛之
後乞歸甘貧樂道吟咏自適著有王靜遺編

縣志

章潤永福人性警敏博洽羣書官十餘年所至多
善政於聲利澹然其清約如寒士甘貧苦節為人

嘆服

縣志

戴之聘灌陽人篤學有文名萬厯間歲貢授廣東

普寧令有善政骨鯁不事逢迎改授益藩理問校尉有不檢者輒以法繩之忤王意遂拂袖歸杜門著述子明聖登萬厯戊午鄉薦歷官戶部郎以清節著明徵登天啟賢書隱居不仕明聖子宸眷復

登崇禎鄉舉

縣志

楊雲才臨桂舉人萬厯中任公安知縣才敏識達規制方畧皆經久計民有訟者數言立決清丈田畝著為條編雖一絲一縷皆平價市以克賦置數

十釜於庭民入城輸賦即就釜炊食詣縣如歸嘗
謂公安百年後必為江圯議遷椒園次祝家岡因
修孟公堤及中堤達於西村曰此可保數十年後

遷縣一如所度

湖廣名
宦志

經學叅全州舉人萬厯間任黎城知縣寬嚴並用
豪猾斂迹編審丁糧絕去弊實尤足為法

舊志

伍睿字用思號明宇全州人萬厯間以進士知新
會縣興學校恤民隱弭盜破奸人以事至一見即

能記其姓名與所言事歷久不忘以故人不敢欺
時山寇海倭充斥睿謂不築外城何以保障乃集
衆計工程審形勢均力役上之兵憲何子明凡建
城九百餘丈民不勞而事集籍其贏金睿無以應
竟以此調去士民為之立祠於象山

廣東名
宦志

劉幼學宜山人萬曆二十五年知清遠縣剛果有
為太監李鳳議於清遠開礦幼學面陳利害鳳為
之沮鳳私人汪某督稅清遠勢張甚欲搆大姓數

人幼學陰為解免邑人德之

廣東名
宦志

徐可久字有功馬平人萬厯間知澂江府遷郡治築磚城闢銅路開河道義倉社學久廢俱以次修

復陞雲南屯田副使

雲南名
宦志

張師益宜山人嘉靖乙卯舉人萬厯初知徐聞縣事性醇雅推誠及物瘞枯骨闢南湖建魁亭文運以振嘗創邑乘以備文獻之考焉

廣東名
宦志

蔣時極全州舉人萬厯間為雲南廣西府通判廣

西為三郡界夙號賊巢時極威名素著諸土司聞其至皆傾心往迎於百里外雖桀驁之首亦望風款見時極申號令明賞罰不煩兵甲夷民讜服

雲南

名宦志

吳貢珍鬱林恩貢任雷州府通判潔已愛民優禮士類軫恤耆老盜賊屏跡地方寧謐時與當路忤被論而歸行李蕭然

廣東名宦志

馬中超全州舉人萬曆四十三年知欽州正已率

物禁差役騷擾嚴保甲四境以寧賊首黃慶忠剽掠為患中超以計撫又條請開復西門設墟場於河之對岸便民交易重修五湖亭政績卓然

廣東名宦志

吳國藩灌陽舉人萬厯四十五年署廣州學正端方正直一時士子皆宗之掌州篆廉明有斷興革深洽民情如新舊學遷明倫堂招致賊首黃月明等皆善政之大者尋陞西寧知縣

廣東名宦志

王銓字衡甫博白人萬歷乙酉舉人任福建汀州別駕時沙陽梗化銓奉檄剿之軍旅已戒念殺傷必多單騎詣賊壘諭以禍福盡降其衆沙陽民德之攝福清羅源長樂古田諸邑篆清慎愛民有青菜三府白水二天之謠知雲南劍川州如治汀郡時年六十八卒銓事父母盡孝謹平生未嘗鮮衣甘食而周恤貧乏鄉里賴之子道大克紹父業庚子領鄉薦署湯陰教諭遷四川儀隴令議賑緩徵

察奸吏鋤豪右儀邑大治以手創乞休歸舟唯圖
書數卷而已結廬白沙號白沙隱士

縣志

李日英字天魁博白人少卓犖有大志以明經任
雲南大理府通判歷署昆明尋甸有政聲緬酋亂
督撫會題日英才可任即率師深入召緬酋諭以
禍福皆釋甲降神宗詔嘉之擢賓川知州豪右多
梗化日英繩以法皆帖服督撫交章薦陞貴州平
越同知苗叛單騎招降黔境安堵巡撫當入覲日

英代行平越民臥轍請留覲既畢不樂仕宦解組
歸嘯傲林泉族黨貧乏計存周恤有范氏義田風

縣志

朱寬桂林人隆慶庚午舉人為三水令撫臣廉其
有治劇才萬厯五年調西寧邑邑當始建草昧未
闢寬銳精擘畫凡築城鑿池分田制里皆身所經
歷且為政寬和撫招新附課農訓士條理井然以
疾卒於官寧民無不悲泣者

廣東名宦志

林致禮上思州人舉孝廉萬歷十四年任西寧令
時城池草創百務未舉致禮毅然以為己任是年
水潦城圯一百九十餘丈綜理修復視前加固開
西山羅旁夜護城鎮安寨平治各處大路以便往
來復鑿山引水遶郭由西而東灌田數百餘頃政
績皆堪不朽

訂廣東
名宦志

伍子瑗全州人天啓二年令清遠時刦盜蜂起子
瑗親歷八鄉嚴保甲捕盜賊麗於法以抗直忤當

道中考功法籍其家一無所有金之士夫斂金代贖子瑗泰然順適嘗曰不敢累家大人素絲葢父

子皆清白吏也

廣東名宦志

李若楠天啓中任平越推官駐鎮新添安賊亂守禦有方賊不敢近陞畢節僉事卒於官

貴州名宦志

李映暘字升台平樂人天啓辛酉舉於鄉任大同府推官明敏清介凡沉獄久不決者剖判如神奉命巡邊措置皆當當事才之以父艱歸後補四川

龍安推官陞興化同知不就

平樂府志

周岐山富川人以明經入仕除高郵州判言行不苟襟度豁如州刺史有疑獄詢之剖決咸中人願質成及致政屏跡杜門人皆賢之

舊志

黃其英宜山舉人兩任衡山貴溪二縣督撫有仁慈愷樂黎民式歌且舞之薦後陞兵部職方司主

事居鄉仁厚式俗

縣志

蔣維芬字蘭甫全州人天啓辛酉舉人初任河南

南陽知縣陞北直永平府推官俱以幹才稱先是
南陽唐王欲圖不軌維芬察之密疏於朝懷宗怒
收王禁錮高牆并下維芬於理後得白尋陞兵部

武庫司主事

舊志

張茂梧字玉林臨桂人孫繩次子以解元登天啓
壬戌進士初任江南貴池知縣調繁改長洲先後
皆以治狀稱擢雲南道御史上疏言事目無權貴
舉朝以為難查督邊工以成績著尋致仕終養著

易經了義行於世

縣志

歐國雋字景修平樂人天啓鄉薦官山東鄒縣教諭陞國子監助教歷戶部主事刑部郎中明允清

慎方正不阿忤閹璫解綬歸

縣志

唐際明號宅揆全州人天啓甲子舉人賦性純孝初任雲南楚雄知縣監開銀礦一日可獲羨餘數百金峻却之聞父訃謝事歸服闋補善化知縣時值湖南重鎮雲集兵戈搶攘際明撫字催科軍民

安堵部院察其廉能薦擢監軍副使

州志

朱毅字士遠臨桂人資性敏異弱冠輒有文名領

宗禎庚午鄉薦授雲南曲靖司理讞獄多所平反

行部按錄活重囚二十餘人滇民懷之

縣志

趙三薦全州人宗禎庚午鄉薦第一令瑞昌性嚴

毅有才智洞悉民隱邑多盜察其老而反於良者

署為約長使督盜盜悉就擒斃之於獄凡數百人

無何陞肇慶同知未行而流賊叢起遂殉難

訂江西名

志宜

張登衡字埜心桂林舉人崇禎間以蜀令移知廣
濟值流寇方橫乃招聚士民屯於大江之洲登衡
御胥吏素嚴秉亂思報憾集黨軟血立義營將為
不軌諸士民亦擇日軟血幟其營曰保定以敵之
兩營方建人情危懼而登衡晏然自若適天旱齋
戒步禱於壇前日再至諸奸莫測所為明日進香
江北廟諸奸從登衡已授計保定營長聞鼓聲伏

衆四起擒其魁數十人投之江餘衆已靖陞蘄州

知州

湖廣名
宦志

張千宸全州人崇禎二年宰英德精明有為值流
寇焚劫清溪千宸率兵親冒矢石相持者三晝夜
賊懾不敢渡江時含滙等處警報甫聞救援旋及
又習練排門夫以壯聲勢保全境內不罹蹂躪任
甫一載以覲行宦橐蕭然鬻負郭田以歸

廣東名
宦志

全在茲字任文靈川人天啓舉人崇禎辛未進士

初授昆山令尋改衡陽潔已愛民衡民呼為慈父

縣志

蔣季誠字明生全州人崇禎癸酉舉人任江南崇

明知縣多惠政邑人立祠尸祝

州志

國朝

文映朝字中含全州舉人

國朝順治間任安慶府同知以慈惠綏民詰奸禦盜
訓士子恤流亡士民頌之有德政錄梓行尋陞戶

部員外郎歸蕭然四壁人以為有五柳風卒年八

十

州志

劉舜濬桂林人順治七年知常德府清操不染招

撫殘黎民甚德之立祠龍陽

舊志

唐嗣昌號繼先全州人順治庚子舉人初任江南

上元令以清慎勤克盡厥職陞湖廣武昌府同知

多惠政卒於官楚人戴德祀名宦

州志

龐穎陸川人舉庚子鄉試任嘉魚知縣當夏逆變

亂獨守孤城盡力保禦後歸養親孝行克敦

舊志

文秉濂全州舉人

國朝康熙七年知陝西淳化縣多惠政縣有浮糧

國初已蠲免後捏報新墾且溢前額賦重累民秉濂

力爭於臺使者事乃寢民感其德建祠祀之

州志

唐之栢字松交灌陽人順治丁酉舉人授漢陽縣

知縣漢陽自明末困於兵之栢在任又當吳三桂

肆逆大兵往來益著盤錯才設水口義渡船清丁

戶緝奸宄修學教士分校得人擢知雲南南安州
邑中斂錢助行却不受調昆陽陞順天治中政績
卓然為戶部刑部郎司農司冠倚重之以老乞休

縣志

蔣學成桂平人知桂陽州政尚平恕嘗刻小學日
記省民格言又於南北門外立社學以教民後卒

於官民為流涕肖像祀於鹿峰

潯州府志

高熊徵字渭南岑溪人順治庚子副榜康熙十三

年吳逆構亂孫延齡叛據廣西遠近震動時岑溪
失守偽總兵陳士龍統兵據之熊徵與邑紳士鼓
勵鄉勇斬士龍復岑溪奉調從征擒其偽將所至
有功十七年春大將軍傅宏烈恢復梧州委署熊
徵團練同知十八年補授桂林教授旋調思明興
學勸士兩地文風為之丕變三十九年陞井陘知
縣會廣西巡撫彭鵬始至知熊徵守城破賊事特
疏薦之遂超擢兩浙鹽運使在官多惠政四十五

年卒所著有郢雪齋前後集等書

舊志

蔣希字肆柯全州人生而奇偉幼不好弄讀書過目不忘作文未嘗起草康熙丁卯舉於鄉筮仕得魏縣攜一弟一僕赴任甫一月完積年重案十七事均會則革陋弊嚴燒鍋賭博娼妓伶人等禁巡撫下其事於所屬以為法魏濱漳河久罹水患屢奉檄築堤元魏兩處互相推諉希勸諭里民均其役於通縣躬赴畚鍤資其糗糧五日夜堤成元魏

賴之衆名曰蔣公堤建義學選士子肄業捐俸資
其膏火魏始有列賢書登進士者初魏人好訟日
投數百紙帝剖決如神二年後幾致無訟以母病
解印綬歸去之日上官致贐父老攀轅不絕歸家
事母至孝撫弟姪曲盡友愛修先塋置祭田兩新
宗祠三黨知交助婚葬傾橐無吝卒之日親疎皆
為流涕郡人士請於巡撫祀鄉賢魏人亦祀名宦

州志

廣西通志卷八十

欽定四庫全書

廣西通志卷八十一

忠義

夫死者人之所難也匹夫效節慷慨奮絕有金石
可泐而志不可奪者見危而授聖人許之粵西自
駱越初開洎乎有明以前夷峒負隅梗亂時作而
義夫傑士躬值險難倡勇勤事寧為蹈忠而死不
為委蛇媮屈以生者指數屈矣今

國家德化旁敷邊宇寧謐猶沛然屢擴

褒忠之典建祠崇祀遐遠不遺俾夫舍生取義卒之死
者常生沒世而名愈烈也豈曰一節可輕而闡幽
別隱顧可無待於紀述也歟志忠義

漢

賈雍蒼梧人漢武帝時為豫章太守出界討賊為
賊所殺去頭雍上馬還營營中咸駭視雍胸中語
曰戰不利為賊所傷諸君視有頭為佳無頭佳乎

吏泣曰有頭佳雍曰不然無亦佳言畢遂死

舊志

衡毅蒼梧人負勇畧與同郡錢博皆為郡太守長沙吳巨所信用建安中天下大亂荊州牧劉表以賴恭為交州刺史巨遂恭奔零陵吳將步騭將至使人諭巨巨欲納騭而後圖之與都督區景謀騭知之乃召二人計事即於中庭斬首以徇遂治舟艦合兵二萬下取南海毅與博念巨部曲舊恩且騭之來非漢命也乃興軍逆騭於蒼梧高要峽口

與隲戰隲幾敗會毅少却隲乘之遂潰毅與衆千餘人皆投水死無一生降者

舊志

唐

龐孝泰博白人龍朔中以功授左驍衛將軍為遼東道行軍總管與蘇定方程名振等征高麗孝泰以嶺西兵逼蛇水蓋蘇文來攻孝泰與戰手殺數十人兵少力屈死之

舊志

于向字仁中祖達為邕州刺史因留家於桂遂為

臨桂之西鄉人向形貌雄偉居父母喪以孝聞咸
通中諸蠻陷安南寇邕管秦州經畧使高駢率禁
兵五千赴邕管會諸道兵禦之向聞東裝往從駢
擊破諸蠻因進復安南駢署向為牙門將尋授本
州團練使後辭歸值黃巢寇嶺南谿峒蠻應之逼
州城主者執當堅守向曰徒示弱耳即上馬引兵
出與賊戰於都狼山連挫其鋒巢暫斂衆以避乃
乘勢深入大戰於洛陽坡後兵不繼向氣忿振提

刀橫擊蠻莫敢櫻會暮蠻散去向被重創亦道卒

巢遂圍城陷桂管

縣志

白聳柳州馬平人仕為義勝都將光啓中寇入郡境盡驅其民掠其財帛聳率所部攻賊奪而歸之

郡人為之立祠

舊志

宋

毛溫富川人為欽州靈山簿時交趾寇陷欽廉白三州守令皆望風而遁溫糾合土豪與戰輒勝賊

勢遂挫遁去事聞召對稱旨加秩

平樂府志

宋士堯馬平人皇祐中儂智高寇邕州士堯率兵往救邕與智高戰不勝少休再戰為所敗被賊斬首士堯尸不墮馳馬還營賊望見傳以為異不敢

逼後贈屯衛大將軍

舊志

徐噩字伯殊其先洪州人五世祖名申唐元和中為邕管經畧使留家白州噩甫六歲好讀書專治周易兼通國語仁宗朝舉於鄉攝知宜州以討歐

希範功擢宣教郎白州長史皇祐間邕賊儂智高叛詔璽討之引兵追至函陽大捷歷戰於金城驛援兵不至而死贈大理寺丞

舊志

梁仲保賓州人勇鷙過人以三班奉職克本州團練寶元中知州吳元球以仲保豫平安化蠻之勞復親增給獎之儂智高引衆向賓仲保迎戰相持數日賊衆益集仲保勢孤竟死戰所智高因陷賓城州人傷之立廟以祀

舊志

潘盎蒼梧人儒衣持妻言動不羣或謂其有先知
儂智高至蒼梧索盎至問之曰君視吾形貌有異
乎盎曰相止賊耳何異也又問曰梧城何日可下
曰雖經歲亦不下復問吾欲奄有嶺海長王南表
何如曰殄滅不久何王之有智高大怒遂害之盎
不為改容

縣志

唐子正字幾卿興安人治平初舉孝廉後通判邕
州熙寧八年冬交趾圍邕子正與蘇緘率城禁兵

固守外援不至城陷子正及緘死之

舊志

毛世毅富川人性勇敢仕為化州石城令劇賊李接反擁衆攻城世毅謂尉曰吾與君當以死衛百姓親率城中丁壯與賊戰衆寡不敵被執遂罵賊而死高宗嘉其忠贈承仕郎

舊志

毛炳字文虎富川人性倜儻不羈好讀書乾道中以平寇功授橫貴廉三州都巡檢使後交寇犯境死於難贈太尉諡忠順武烈二子維蕃維瞻並登

進士舊志

李珙字溫之永福人少業儒尚氣節三試禮部兩
陞上庠不偶乃慨然以功名自奮會宜州蠻入寇
以禦賊首功補右職進築南丹州以珙攝州監押
為先鋒羣蠻畏懾納款歸疆積官至武功大夫劇
賊劉花三嘯聚自虔吉入寇廣東朝廷議擇將禦
之除廣東路至則盡俘其衆檻賊首送京師擢忠
州刺史知融州議者以為賞輕拜邕州團練使會

金人犯京以蠟書召天下兵珙聞之集僚佐曰主憂臣辱主辱臣死豈可以道遠便自營乎募死士三千人屬通判蔣炳文與俱炳文托為桂帥所留珙獨引兵進北至衡州賊將擁數萬衆扼其前旁郡皆閉城自守或勸珙宜退珙不從竟戰死事聞贈忠州防禦使官其子一人詔旌其門曰忠義

舊志

元

鄧祖勝南寧人以右丞守永州聞楊璟師至約全

桂守者互相應援全桂援絕城中食盡或勸暫投
他郡以圖後効祖勝慨然曰吾受封疆之寄保釐
南邦不能禦難以至此復何面目視息人間分當
効死報國寧貪生耶璟督師四面攻之遂抽刃自

殺

舊志卷元
史類編

趙元隆字祖森興安人元末為廣西行中書省都
事尚奇勵節嘗讀書至士為知己者死拊几歎曰
烈士當如此矣聞楊璟師壓永州勸平章額爾吉

納發兵救永曰永桂之敵無永則無桂也况鄧侯
有約義不可負平章聽之既聞全州不守所遣兵
復敗永破鄧祖勝自殺元隆乃約平章共以死守
又私與同官言昔荷鄧侯知遇所以不即死者期
效尺寸以報之今鄧侯死矣尚可獨生乎元隆分
守伏波門久之從西門入顧謂從者曰此吾死所

遂引兵自決

舊志

葛德聲葛才聲陽朔人通達時務尤有勇畧當元

李之亂民無所依乃率衆登山立寨保障堅守境
以獨全及明太祖遣兵至率衆歸附邑賴以安

縣志

明

覃聰容縣人洪武間授百戶每擊賊奮勇為諸士
先廉州所印為賊擄去聰奉調追賊以計奪印還
復與戰力屈死之葬博白六練村

舊志

錢家寶懷集人永樂二十二年以招安賊首楊文
寬功授慈樂寨副巡檢世襲先是邑長吏謀建學

宮家寶言曰學宮所以教吾邑子弟者義不可後

遂捐金作明倫堂三間以為衆倡

縣志

易先全州人國子生知諒山府有善政任滿當還

交人乞留進三品俸留諒山洪熙元年交人叛死

之贈布政司叅政

州志

朱瓊臨桂人登正統鄉舉任開建知縣有幹濟才

天順二年春流賊攻縣治瓊冒鋒鏑禦賊以無援

遂死舉家罹禍百姓傷之

縣志

蘇志懷集西水里人正統八年以勇士招撫賊首

覃志亮功授武城鄉土巡檢

舊志

宋欽蒼梧人永樂十五年領鄉薦入太學授戶部主事陞郎中建白多經國善計陞湖廣右叅議正統十四年麓州亂朝命遣靖遠伯王驥征之以欽督餉欽不避艱險乘小桐槽往安洪等江次盧溪與賊遇率所隸兵迎敵厲聲數其罪詞氣壯烈賊不敢害陞廣東右布政使未幾改授江西晉湖廣

左布政使時苗寇作逆悉心經畫寇平遂致仕歸
天順六年寇陷梧城欽率郡人力戰死之祀鄉賢

縣志

周昌宜山人平生負義有古烈士風時地方多事
昌為千夫長鼓舞民兵人人奮義所向無前本府
同知葉正壯其才委禦鷄辣等寨賊昌率眾集西
府廟軟血為盟誓不與賊俱生及見葉馬斃易以
已馬正扶掖而升偶中流矢死之

舊志

龍彪昭平人智勇有能成化間夷賊作叛衆舉彪
千夫長斬賊帥胡公強並擒鄧公間等六百九十
九名題奏昭平寨土巡檢司世襲後龍景雲任淵
等於隆慶六年平上下四屯等處子孫勛績相望

如此

縣志

何清陸川人成化間寇作時清祀祭家居以計隨
布政使陶魯勦絕之遷學獨任其勞兩為巡檢悉
以能著清同邑人周南者庠生有文名與清並隨

陶魯討滅草寇斬其巨帥以獻又龐杰亦縣人由
胄監任番禺主簿有勇畧寇作與南設計捍禦地

方賴之

舊志

蔣璣字天器平樂人弘治壬子舉人授連城知縣
璣始城連城而武平賊劉隆作亂鄰邑多被剽掠
惟連城賴璣故全由是以智勇聞當道檄搗賊巢
被執不屈遂遇害事聞贈汀州府同知廕其子國

學生祀鄉賢

平樂府志

陳明錦北流人少有智慮膂力正德中舉為勇敢
總甲壬戌歲妖賊李通寶率眾攻城明錦領民兵
週遭巡守賊不得上計窮將退有賴福者賊黨也
先偽入城與明錦同事出不意拔刀斬明錦足仆
地賊因得登城城遂陷後賊退官司以聞於監督
總戎金鍾乃計擒賴福斬於市命官收明錦屍親
往祭嘉其義勇

舊志

黃竇黃積上思州人其母一乳而生長有義氣正

德八年黃鏐攻州二人敢勇赴敵同日而死

舊志

凌安上思州人當賊黃鏐之叛每歲倡衆奮勇以拒之幾踣者再氣不懾嘉靖元年賊又至設寨以

守竟死於敵

舊志

周真富川人庠生嘉靖元年邑西鄉賊馮道任作亂熾甚真白諸當道賈勇剿撲賊遂潰散西鄉居

民復其田疇廬舍皆真之力

平樂府志

陳琚字宗玉南寧人嘉靖四年由監生任廣東德

慶州判官時羅旁冠熾流毒郡縣据提偏師相機
剿撫分為十五處定約束俾與州人互市俟其狎
而圖之有奸人洩謀寇束甲如市猝然變作据遂
遇害後督府王守仁擒寇魁趙本殺之命祭其墓
舊志

唐一岑字鍾卿臨桂人嘉靖丁酉舉於鄉授崇明
知縣倭始窺吳道由崇明一岑晨夕督屬縣人為
戰守具亡何倭果率眾來攻一岑敗之多所斬獲

倭衆憤甚已乃盡銳復攻力竭援絕倭入城一岑
死之贈光祿寺丞廕其從子入太學仍建祠於縣

曰閔忠

舊志

周尚華永淳人嘉靖十七年舉里寇亂知縣方鵬
招義勇禦之閔兵於演武廳尚華克排年慨然爭
先令甚壯之賜酒三行復率兵奮勇殺賊賊退有

功後舉耆民壽七十卒

舊志

陳文燦文炳兄弟也永淳人補邑弟子員有武畧

淶里冠發部兵征逐文燦馬陷於淖文炳欲救不得痛不忍去皆遇害

縣志

魏文瑞字麟卿臨桂人登嘉靖壬子鄉試授定州學正陞鄆縣知縣丁母憂補漳平會龍巖賊蘇阿普漳平賊楊一聚黨五六十人永安大田連城清流諸寇騷然嚮應贛州軍門檄文瑞合三縣兵剿之即統兵行次曹寨白龍巖曹姓者賊謀主也陰以報賊賊伏以待文瑞至伏者四起兵潰死之贈

光祿寺少卿蔭一子

縣志

陳文明桂平人以明經太學除松溪丞時嘉靖壬戌倭分道入閩自溫州登陸所經福安壽寧政和三縣俱攻破十二月抵松溪勢張甚令欲棄城去文明謂城完固塲圃初畢餘蓄可守乃集邑民分布乘陴自分北面分既定間出兵數與賊戰殺傷兩相當令議與倭和括民間金帛往並張宴出陪賊笑不食進金帛不受酬以倭刀一文明曰是欲

屠吾城藉令不幸如政和丞為賊所鬻食亦分也
誓必死激厲邑衆感憤出涕會募遂應坑兵及溪
源鄉兵各數百二十二日未明賊詐以別梯緣南
城而擁雲車自北進車上作轉輪飛梯未至數丈
輒掀梯城上揮刀登陴閃爍炫目衆畏懼稍退文
明戮先退者適張德奮巨斧斫一賊下一賊繼上
又斫之衆謹呼而前賊氣沮遂下礮石折其梯收
民間竹燈篝然之揮出車上火熾不能卒滅遂灰

其車賊皆潰爛墜自相壓礮石亂下擊死者甚衆
又用火發煩擊賊營賊倉皇驚竄會募栗陽兵三
百人至其兵進退有法紀律閒整殺賊數十人賊
忿以為自海洋登陸未嘗受刃若此拔營去文明
以殺賊保境忠勇卓絕陞瓊州感恩縣知縣

舊志
參西

事
珥

林致孝上思州人年二十五歲豪俠自負嘉靖三
十一年秋黃天錫叛巢於佛子墟致孝挺身入以

窺虛實冀乘間而陰斃之被執誘降許以不死致孝極力叱罵聲色俱厲賊遂支解以殉州守聞而悲之贍其孤以田且紀事以勸邊方之義勇者

舊志

李安富川人常熟簿李昭宗養子素驍勇從昭宗之官嘉靖癸丑倭奴聚海上焚劫松江太倉安屢欲赴闕昭宗止之曰踰境殺賊非吾職也冬十月賊航海犯常熟縣令率民兵禦之以昭宗為前鋒安從焉時賊方劫民安隔水罵曰賊出就吾刀其

一人超距而來安寧弩射之應弦而斃又二人馳
刺安安揮矛斷其手足而斃餘四人并力擊安安
盾忽裂且蹶泥滓中遂遇害倭相戒云常熟子善
騎射宜遜去邑賴以全縣令謂安以死勤事禮葬
之北郊

舊志

梁喜栢永淳人嘉靖三十八年輪克千夫長震龍
山強賊猖獗縣令朱輪檄喜栢捕緝即奮力踴躍
帶鄉勇十數人追至靈竹突遇強賊數百挺身向

前敵勢張甚退走陷涇田遇害縣令親臨拜祭

舊志

王瀏懷集所百夫長嘉靖四十三年山賊掠鄉村
圍歐馬二寨正危急時瀏帶官兵奮勇與戰賊敗
逃不敢再出巡撫獎之曰提兵三百退賊一千及

瀏老疾仍准給全俸優養終其身

縣志

潘文案昭平人有膽氣精弓馬時縣令團練鄉兵
遇賊出單騎衝前莫敢當其鋒者生擒賊首藍孟
乾周林相等解道紀賞上四屯黎福莊對敵斬首

百餘名震徭夷方論功而身旋歿

縣志

朱裳懷集守禦所百戶以智勇聞隆慶二年山賊陳龍洲猖獗剽掠縣境裳率軍兵截捕力戰於塔山麓殺賊甚衆援兵不至死之四年僉事楊文明

遣官持祭表其門曰旌揚忠義

縣志

潘積讓昭平人時五指山賊依巖穴嘯聚數萬人屢征不寧積讓與把總王綱計誘擒之復議兵設守寧化境賴以安為人尤慷慨好義濟人之急萬

歷十八年大饑出禾十二萬勛賑其鄉全活甚衆

縣府監司兩院俱嘉獎

縣志

孫克恕字推之馬平人萬歷甲午舉於鄉歷官貴州副使分巡思石道安邦彥之亂戰死有虎守其骸不去蠻人嗟異事聞贈太僕卿賜祭葬

舊志

黃燦然字象奎博白舉人任四川夔州府大昌令

今太平縣

後解組歸里適安仁賊李高李祿等竊發被

執擁至穴釋其縛延之坐謂曰吾輩欲舉大事所

欲得於公者財爾燦然厲聲罵曰鼠輩竄伏山林
旦夕誅滅我肯助爾為虐耶賊怒曳出斬之臨刃
迫之跪笑曰死即死耳我膝豈為賊屈遂遇害

縣志

唐世熊灌陽人萬厯乙卯鄉薦授富川教諭累官
永平知府甫下車見民居半燬村落邱墟極力撫
綏民多起色九年秋永復困於兵荒捐俸賑救全
活者萬餘人會宦者高起潛督邊勢赫奕監司以
下莫不膝行惟謹世熊長揖不屈大拂其意後叙

功應優陞僅移山東鹽運使十二年正月濟南城

陷堅守西門死之事聞有旨優卹祀鄉賢

縣志

龍文光字煥斗柳州人天啟壬戌進士初授新建
令邑有弟誣兄毆母者以藥傅母背令作腫狀迫
求往驗文光疑之故遲不出及訊則腫平矣遂直
其兄通邑驚以為神歷任吏部郎督學貴州剛直
不阿校士輒婉曲訓誨士多化焉歷陞四川巡撫
值張獻忠寇蜀文光勵兵措餉期以禦賊賊至衆

寡不敵城破被執不屈死於濯錦橋

舊志

蔣佳徵灌陽人天啟四年舉於鄉崇禎丙子知盱
眙縣均貧富之糧土客之役差不下鄉三十六集
以安縣故無城佳徵知賊易至訓民為兵次年賊
犯境方設營禦賊又清算錢糧移貯州城未幾獲
哨賊既而賊大隊入遇紅衣者射之應弦而倒大
砲齊發賊大潰無何火藥匱賊乘勢破營殲士卒
佳徵且殺且罵遂遇害及斂顏色如生萬戶哀痛

崇禎十年褒卹死節諸臣贈佳徵尚寶卿巡按御

史言宜賜諡廕乃建表忠祠祀之

縣志

唐良銳全州人天啟甲子舉人任靈璧知縣流寇張獻忠攻城率兵民固守力竭城陷死之贈按察

司僉事廕一子入監

州志

文昌時全州人天啟甲子舉人任臨淄知縣以廉慎聞時閩賊告亟邑人謂昌時曰公即守土如家

室何曷先避昌時執不可城陷舉家自焚

州志

蔣秉綵字衷白全州人天啟甲子舉於鄉授靈邱令律已清廉臨民平易有古循吏風會流寇犯境秉綵曰吾當以死衛百姓召募義旅憑城拒守城破罵賊而死闔家殉之

州志

蕭日高字旭祥平樂人明季棄舉子業為邑吏崇禎十六年任四川義眉主簿流賊張獻忠圍義眉日高佩縣印率民兵悉力拒守獻忠怒攻益急城破死於難

舊志

唐一中字可權全州人崇禎癸酉鄉薦精於古學
從遊多名士授鉅鹿教諭已卯寇陷城被執不屈

死之

舊志

朱永吉字飛之桂林人精天文術數初客黔投傅
宗龍幕中安邦彥圍黔永吉解圍有功又隨宗龍
至滇崇禎間滇撫王位討普名聲題授遊擊屢破
賊衆為名聲所憚後因吳必奎通賊永吉身被重
傷力戰不已會諸軍皆潰自刎死偏將趙能馮忠

葬於路側趙能亦自刎事平題請廕一子世襲百

戶舊志

蔣秉芳字昆瑞全州人博學能文督學夏啟昌國

士期之以明經授柳州司訓賊至不屈死之舊志

朱旻如字宗臣臨桂人膂力絕倫隨父宏之吳川

海寇犯城單騎突出斬其渠魁賊望風披靡境賴

以寧父遣歸就學中武科授楊家營把總八排盜

為亂楚粵合師討之比年不克旻如以計誘致平

其巢穴叙功陞御營將領謁選至贛州僕逸失其
容劄賴撫疑為奸細將殺之旻如面不改容具述
顛末兵部萬元吉請釋之歸里奮然激發傾貲募
士赴平樂率衆城守庚寅我

朝大兵由龍虎關進或勸之降旻如曰吾與城為存
亡決不貪生邀富貴也未幾城破旻如殺其妻女
引刀自刎伏尸塵土中十餘日家人掘起視之猶

凜凜有生氣

舊志

石之碧荔浦人幼好韜畧及長從戎崇禎初以撫

江賊功授昭平叅將

舊志

唐鍾祚平樂人適流寇肆虐煽惑生變鍾祚應募
團練仙迴設法整輯始獲安寧丁亥三月廣東陳
恩兵突入仙迴大肆剽掠鍾祚正詞拒之兵佯退
潛匿人家鍾祚佩劍率二僕往諭之被執罵不絕
口主僕皆罹害其妻孫氏妾馬氏亦罵賊死

舊志

文師頤全州人天啟甲子領鄉薦崇禎十五年知

汝陽縣城陷不屈而死

河南通志

蘇良貞思恩貢生初授山東濱州判陞南京羽林衛經歷後家居崇禎十七年羣盜入城擊庫奪印良貞同弟良輔良臣統率鄉勇拒戰被害賊置印其懷而去有司立忠義祠春秋致祭良輔寶坻縣

丞良臣上林教諭

舊志

駱士昇武緣廩生崇禎末賊入城獲士昇誘以利

不從罵賊而死祀忠義祠

舊志

戴震字靜夫馬平歲薦博極羣書淵源理學尤喜
獎進後生崇禎時任淞江常山教諭建青雲樓立
館舍延士子講學其中朝夕不倦力追胡安定所
為遊其門者多獲雋人常思之勒石青雲樓後陞
邑令明末之亂為土寇所執不屈而死

舊志

覃文應柳城人天啟歲薦授四川巴縣丞流賊張
獻忠圍攻城陷文應具朝服北向拜遂投井死其
子懋德亦投井從父弟文勝被執砍手歸道其事

士類贊之

舊志

劉飛漢灌陽千戶

國初廣西甫平宇備魯世珍鎮灌邑飛漢以祖父世受明恩乃詣城下呼曰非敢逆也願死以答先朝畢吾志耳執之解院司冀其歸心卒不可奪被誅世珍私殲其二子人多悼之

舊志

曹應元字騰宇懷遠廩生當

國朝未平粵之先流賊李來亨等蹂躪地方應元盡

散產業聚集鄉勇分布守禦為一邑保障弟應魁

終明季亦以武畧著

舊志

國朝

鄭振祖弟拔祖俱鄭寶之後入籍鬱林順治初土
寇八鎮糾衆數萬作亂圍鬱林三閱月城內糧盡
兵民困極有顏伯素者領兵博白鄭兄弟素與友
善乃冒險夜絕城以荷葉蒙首由河塘水中潛出
詣博白請顏氏兵至梁道嶺與巡道黃廷師約舉

火為號內外夾攻未至而土寇蕭荆璧先計誘破城三人引兵奮勇赴援力屈遇害州人哀之配祀

忠孝祠

州志

李茂字天毓岑溪人崇禎己卯鄉薦積學能文恬退不仕康熙十三年滇逆變亂茂鼓勵鄉勇殺其偽總兵陳氏龍氏民賴以安後逆踞岑茂被執憤恨而死邑人請祀鄉賢

縣志

劉需灌陽人順治初見亂賊曹志建蟠踞龍虎關

僭稱國公大肆荼毒遂奮起招義勇屢敗之後為
曹賊所擒謂曰誰為爾主此謀者試言之吾貸汝
死需厲聲曰汝之悖逆吾恨不能手斷汝賊怒剛
之人皆憤惜

舊志

朱大寶灌陽百戶所部下軍人也順治三年邑紳
陸仁敷歸甯是夕盜窺其家將砍城行刼值大寶
巡城見賊突至奮勇獨登手擊一賊曳至縣前羣
盜蜂集為所殺後屢見英爽於城邑人立像祀之

縣志

曹維屏懷遠人康熙十八年撫蠻將軍傅宏烈授
叅將職銜委以團練維屏躬冒險阻率苗獍逐退
餘逆境賴以寧

舊志

黃毓奇桂平庠生沉毅多智畧明季盜起捍禦一
方康熙八年邑人楊其清妖術惑衆知府劉浩謀
於毓奇率鄉勇數百守城境賴以安十三年吳逆
變亂偽將王明將肆掠毓奇傾得之捐金賂其左

右得免十七年土寇易天章領賊千人掠下都里

毓奇預為備遂大敗賊屢有功於桑梓

舊志

謝天祐桂平監生康熙十五年馬回子作亂擄掠

至崇姜里甘村男婦老幼危在旦夕天祐挺身見

賊說以利害存活甚眾亂平之後代窮民納差糧

修大黃江以通舟楫由良四單至崖龍長一百餘

里無擔負之勞且可資灌溉為鄉所思

舊志

易友亮字連美全州人初為本省院丞有能聲大

中丞馬雄鎮器之委以本標守備招募士卒保固疆圉甲寅吳逆變亂逆帥孫延齡附從中丞誓身殉國密令友亮赴柳請援不應復令友亮導其長子世濟出郭托楊啓祥送至京事急友亮又與同事唐正發唐守道等潛出中丞幼子世永孫國貞間道赴都至豫章計可無虞友亮返粵報命是時延齡稔知其事繫友亮家屬於獄幽中丞別室友亮鬻產賂賊得通音問供給無缺及吳世琛入粵

殺孫延齡中丞殉節友亮逃匿荒郊收中丞遺骸

草葬之事

聞特授兗州遊擊罷官歸以壽終

舊志

唐正發字昌期全州人少事中丞馬公雄鎮會孫延齡叛粵中丞密召正發計議正發慨然懷血疏負中丞一子名世永年七歲一孫名國貞年八歲委曲區畫扮鄉民出重圍由間道行荼苦備至引見備詢情形大加歎賞曰此人不避艱險忠蓋可嘉著

議叙時正發念中丞死生未卜復間道返粵而中丞已闔門殉節矣延齡聞正發攜中丞之子若孫歸京師移禍於正發眷屬其妻蔣氏自經長子士介被戮胞兄廷俊幾死囹圄正發悲生哭死潛匿山中賊平授涼州鎮守備調閩浙督標左營軍政列薦陞浙撫標中軍遊擊所至有聲以老乞休年九十二唐守道唐文煥俱全州人當雄鎮被逼與正發等共事守道授廣東守備罷歸文煥初授守

備職因年老未任巡撫傅宏烈贈以義高存趙扁
額孫曾孫相繼中武舉列膠庠人以為忠義之報

舊志

楊啟祥字永昇靈川人充撫軍承舍康熙十三年
吳逆陷桂林時巡撫馬雄鎮被逆帥孫延齡逼降
不已啟祥奉雄鎮命領其長子潛奔湖廣關口盤
詰詭稱江西醫人逃出關報知江西巡撫立具疏
以

聞啓祥乃同雄鎮子入奏授守備職銜後雄鎮殉節康熙二十年又偕雄鎮子扶柩入京未幾補山西壽


陽守備在任八年告歸壽八十一卒

舊志

覃海芳岑溪縣人克永業鄉練總鄧老李則七山
猺練鄧雙頂鄧廷華則老李姪也康熙乙未十月
盜剽藤縣地麻坡過岑溪海芳即帥鄉勇要截殺
二賊途遇老李及六山猺練覃法滿遂合兵追賊
賊屯蓮塘以待之相持三日海芳謀曰明日日送

賊去我退賊必復來地方何日得寧我前誘賊賊必吾追爾於兩山伏弩射之蔑不勝矣老李曰諾海芳背腹受敵法滿畏走老李馳救賊攢矛刺之雙頂廷華大呼直入賊圍之數重遂同時被害

舊志



廣西通志卷八十一